

續資治通鑑

冊  
三

卷之三十一

三

續資治通鑑卷第四十七

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

宋紀四十七

起開逢活灘八月盡旃蒙作噩九月凡一年有奇

仁宗體天法道極功全德神文聖武睿哲明孝

皇帝

慶歷四年

遼重熙十三年

八月辛卯命參知政事賈昌朝領

天下農田范仲淹領刑法事有利害其悉條上初仲

淹建議周制三公分兼六官之職漢以三公分部六

卿唐以宰相分判六曹今中書古天官冢宰也樞密

院古夏官司馬也四官散於羣有司無三公兼領之

重而二府惟進擢差除循資級議賞罰檢用條例而

已上不專三公論道之任下不專六卿佐王之職非

法治也臣請倣前代以三司司農審官流內銓三班院國子監太常刑部審刑大理羣牧殿前馬步軍司各委輔臣兼判其事凡勅置新規更改前弊官吏黜陟刑法輕重有利害者竝從輔臣予奪其事體大者二府僉議奏裁臣願自領兵賦之職如其無補請先黜降章得象等皆以爲不可久之乃降是命然卒不果行四甲午以樞密副使富弼爲河北宣撫使先是輔臣奏事垂拱殿帝曰契丹主受禮雲州將襲我河東兩府宜設備弼退而上言河北平坦河東險阻河北富實河東空乏河北無備河東有備契丹必不捨河北而襲河東臣近奏河北守禦之策乞守要郡自行其事不惟訓兵備敵以安元元至於身羞國恥庶幾可刷於是命弼宣撫河北其實弼欲出避讒謗也

保州巡檢司雲翼卒擁都監韋貴據城叛知州劉繼宗渡城濠溺水死知廣信軍劉貽孫與走馬承受宋有言臨城諭之叛兵有欲降者計未決而諸路各進兵來討遂復固守拒命 戊戌以右正言余靖爲回謝使使於遼其復書略曰若以元昊於北朝失事大之體則自宜問罪或謂元昊於本朝稽效順之故則何煩出師矧延州昨奏元昊已遣楊守素將誓文入界儻不依初約則猶可沮還如盡遵承則亦難卻也 以右正言知制誥歐陽修爲河北都轉運按察使帝諭修曰勿爲久居計有事第言之修對以諫官乃得風聞今在外使事有指越職罪也帝曰事苟宣聞不可以中外爲辭諫官蔡襄孫甫奏留修不許以余靖知制誥仍知諫院以知諫院蔡襄直史館同

修起居注

詔入內供奉官劉保信往視保州兵亂

庚子命右正言田況度視保州仍聽便宜行事

壬寅降敕榜招安保州叛軍仍詔知雄州王德基牒報北界恐緣邊人戶驚擾也 甲寅朝議以諸道兵集保州城下未有統轄因詔宣撫使富弼促行往節制之再降敕榜招安仍令田況等且退兵選人齎敕入城若遂開門卽一切撫存如尙拒命則益兵進攻其在營同居骨肉無老幼皆戮之先是知定州王果率兵趨保州攻城甚急會有詔招安賊不肯降登陴呼曰得李步軍來我降矣李步軍謂昭亮也詔遣昭亮是日昭亮至與況同諭賊賊終未信右侍禁洛陽郭逵徑踰壕詣城下謂賊曰我班行也汝下索我就汝語賊乃下索卽援之登城謂賊曰朝廷知亂不由

汝由官吏遇汝不以理今赦汝罪又以祿秩賞汝使  
兩制大臣奉詔書來諭汝汝何疑賊皆相顧動色曰  
果如此乎乃更召其所知數人登城賊信之爭投兵  
下城降者一千餘人遂開門納官軍其造逆者四百  
二十九人況具得其姓名令楊懷敏率兵入城悉坑  
殺之〔攷異〕東都事略郭逵傳云雲翼軍擁兵馬都監章貴據城叛  
兵馬監押待其臻為賊所留李昭亮討之不能下因遣逵逵故  
與臻同事仲淹徑至城下取紫佩囊示之臻曰是非昔事范公物邪  
臻與貴即再拜曰願君入城相見逵登城徑入開諭禍福既而臻貴  
悔欲害逵衆蔽之得免臻貴自剄與此異今從長編又李昭亮傳云  
昭亮從數十人叩城扉袒示城上不以甲盾自蔽為曉譬禍福賊遂  
降長編引會要云遣郭逵入城諭  
賊是諭賊者乃郭逵而非昭亮也降卒二千餘人悉分隸諸

州宣撫使富弼恐後生變與都轉運使歐陽修相遇  
於內黃夜半屏人謀欲使諸州同日誅之修曰禍莫  
大於殺已降況脅從乎既非朝命諸州有一不從為  
變不細弼悟乃止〔攷異〕宋史附傳或以富弼為  
夏竦今從蘇轍所作歐陽修傳乙卯帝

謂輔臣曰如聞諸路轉運按察提點刑獄司發擿所部官吏細過務爲苛刻可降敕約束之先是監察御史劉湜言轉運使掎撫州縣苛束官吏人不得騁其材包拯言諸道轉運使自兼按察及置判官以來體量部下官吏頗傷煩碎欲乞於郊禋赦書內特行約束凡官吏先被體量者情非故犯咸許自新於是降敕約束諸路按察使備載臺官所上之言歐陽修奏曰自差諸路按察雖未有大效而老病昏昧之人望風而懼近日致仕者漸多州縣方欲激清而朝廷自沮其事乞令兩府召臺官上言者至中書問其何路按察之人因挾私怒苟有迹狀乞下所司辨明若實無人乃是妄說其近降劄子乞賜抽還不使四方見朝廷自沮按察之權而爲貪賊老繆之吏所快先



是夏遣使朝於遼遼主怒其對不以情羈之丁巳夏  
復遣使來遼主詢以事宜又不實對遼主答之 戊  
午詔自今除臺諫官毋得用見任輔臣所薦之人  
徙知滄州劉渙知保州渙至踰月雲翼軍又謀反渙  
以單騎至械其首惡誅之一軍帖然 九月辛酉田  
況奏保州平壬戌詔保州官吏死亂兵而無親屬者  
官爲殯斂戰歿兵官竝優卹民田蹂踐者蠲其租  
河北都轉運按察使天章閣待制張盈之落職知虢  
州緣邊都巡檢楊懷敏嘗領兵至保州特免罰初盈  
之聞保州亂自魏馳至城下召諸部將分攻城使人  
謂懷敏曰不卽來當以軍法從事旣至就坐又以兵  
自衛盈之斥去之故懷敏深恨盈之嘗密奏殺盈之  
則賊降矣富弼力爲盈之辨帝意解猶坐前事落職

戊辰壽州言太尉致仕申國公呂夷簡卒帝涕下曰  
安得憂公忘身如夷簡者贈太師中書令謚文靖夷  
簡當國柄最久雖數為言者所詆帝眷倚不衰然所  
斥士旋復用其於天下事屈伸舒卷動有操術後配  
食廟庭始王旦奇夷簡謂王曾曰君其善交友之卒  
與曾竝居相位後曾家請御篆墓碑帝因慘然思夷  
簡書懷忠碑三字以賜之

一攷異一呂氏家塾記云皇祐初王沂公家始乞御篆碑額仁宗同日

自制一碑名親書以賜二家沂公曰旌賢碑文靖公曰懷忠碑各三字王子融乞上為沂公親書碑額上曰呂夷簡何故無請左右曰非故事也遂親書懷忠碑賜之春明退朝錄云懷忠踵沂公而賜誤也李燾引實錄云書懷忠之碑四字東都事略云書懷忠碑三字今從

事略 庚午平章事兼樞密使晏殊罷為工部尚書知

潁州殊初入相擢歐陽修等為諫官既而苦其數論  
事或面折之及修出為河北都轉運使諫官奏留修  
不許孫甫蔡襄遂言莊懿誕生聖躬為天下主而殊

被詔誌莊懿墓沒而不言又奏論殊役官兵治僦舍以規利殊坐是黜然殊以莊獻方臨朝故誌不敢斥言而所役兵乃輔臣例宣借者又役使自其甥楊文仲時謂非殊之罪云

致異龍川別志云晏殊作相入大王府疾華上親往問疾王曰久不見官家不知誰

作相上曰晏殊也王曰此人名在圖讖胡為用之上歸閱讖得成敗之語竝記莊懿誌文事欲重黜之宋祁為學士當草麻詞爭之乃降二官知潁州詞曰廣營產以殖私多役兵而規利以它事罪之殊免深譴祁力也李燾云元儼以此年正月薨殊以九月罷自春初至秋未凡半歲有餘乃罷殊相此蓋妄云

壬申參知政事賈昌朝言用兵以

來天下民力頗困請下諸路轉運司毋得承例折變

科率物色其須科折者竝奏聽裁即有宣敕及三司

移文而於民不便者以聞從之遼主親征元昊會

大軍於九十九泉以太弟重元北院樞密使韓國王

蕭惠將先鋒兵東京留守趙王蕭孝友率師以從

丙子以荆湖南路體量安撫王絲為廣南東路轉運

按察使兼本路安撫絲在湖南凡十月蠻既衰息乃徙廣東 丁丑元昊復遣楊守素來議事 甲申以樞密使吏部侍郎杜衍同中書門下平章事兼樞密使衍務裁僥倖每內降恩率寢格不行積詔至十數輒納帝前諫官歐陽修入對帝曰外人知杜衍封還內降邪凡有求於朕每以衍不可告之而止者多於所封還也 以參知政事賈昌朝充樞密使資政殿學士知青州陳執中爲參知政事先是傅永吉以誅王倫故驟遷得入見帝面獎之永吉謝曰臣非能有所成也皆陳執中授臣節度臣奉之幸有成耳因極言執中之美未幾帝謂宰相曰執中在青州久可召之遂召執中參知政事於是諫官蔡襄孫甫等爭言執中剛愎不學不可任以政帝命中使齎敕告卽青

州賜之且諭意曰朕用卿舉朝皆以爲不可朕不惑  
人言力用卿耳明日諫官上殿帝作色迎謂之曰豈  
非論陳執中邪朕已召之矣諫官乃不敢言丁亥  
宴宗室太清樓射於苑中初元昊以誓表來上其  
詞曰兩失和好遂歷七年立誓自今願藏盟府其前  
日所掠將校民戶各不復還自此有邊人逃亡亦無  
得襲逐悉以歸之臣近以本國城寨進納朝廷其柁  
棹鎌刀南安承平故地及它邊境蕃漢所居乞畫中  
央爲界於界內聽築城堡朝廷歲賜絹十三萬匹銀  
五萬兩茶二萬斤進奉乾元節回賜銀一萬兩絹一  
萬匹茶五千斤賀正貢獻回賜銀五千兩絹五千匹  
茶五千斤中冬賜時服銀五千兩絹五千匹及賜臣  
生日禮物銀器二千兩細衣著一千匹雜帛二千匹

乞如常數無致改更乞俯頒誓詔世世遵承儻君親之義不存或臣子之心渝變使宗祀不永子孫罹殃

冬十月庚寅賜誓詔諭國人藏書祖廟

〔攷異〕宋史云賜曩霄誓詔歲

賜銀絹茶采凡二十五萬五千本誓表所列銀絹各數并之正合然銀以兩計絹以匹計茶以斤計以非一類宋史并而數之文雖省而

事未

辛卯太子太師致仕陳堯佐卒諡文惠

甲

午詔河北沿邊安撫司械送遼駙馬都尉劉三叟至涿州三叟六符之兄也尚同昌公主與公主不諧逃至廣信軍輔臣議厚館三叟以覘其國陰事諫官歐陽修亦請留之帝以問杜衍衍曰中國主忠信若違盟誓納叛亡其曲在我且三叟舍近親而遁逃謀身若此惡足與謀國帝從衍言遼人得三叟殺之

〔攷異〕儒林

公議云三叟攜嬖妾偕一子投廣信軍自言公主凶很必欲殺其妾與子故歸朝廷上詩云春秋大義惟觀釁王者雄師但有征朝廷以誓約既久納之生釁乃遣還三叟復由西山路逃至定州定帥遣人拘送比至幽州其妻已先在矣乃殺其妾與子械送三叟以其昆弟

方委任貸二報死監錮之與遼史異洪稚存曰儒林公議傳聞之誤耳長編以爲二報惡其妻淫亂故逃此敵國詆毀之詞遼史二五二報與公主不諧奔宋歸殺之當得其實

知諫院蔡襄以老乞鄉郡己酉授

右正言知福州襄與孫甫俱論陳執中不可執政既不從於是兩人俱求出而襄先得請時甫使遼未還也范仲淹言麟府二州山川回環五六百里皆蕃漢人舊耕耘之地自爲西賊所掠今尙有三千餘人散處黃河東涯自來所修堡寨只是通得麟府道路其四面別無城寨防守邊戶至今不敢復業糧草踴貴官中大費錢帛糴買河東百姓又苦饋運今二州之人皆願修起城寨若只以河西兵馬糧草般移應用自可辦事況折氏疆盛之時府州只屯漢兵二千今雖殘破兵馬常及萬餘如招輯蕃漢人戶從而安居疆人壯馬又可得數千卻減屯漢兵茲誠守禦之

長計也。因奏張亢得所增廣堡寨，宜使就總其役。詔既下而明鎬持不可，屢牒止亢。亢曰：「受詔置堡寨，豈可得經略牒而止邪？」督役愈急。卒事乃上章自劾。朝廷不問。蕃漢歸者數千戶，歲減戍兵萬人。河外遂安。皇祐中，韓琦經略河東案堡寨處，多北漢名將楊業所度者，益知亢有遠略云。遼主之西征夏也，元昊上表謝罪，繼遣使奏欲收叛黨以獻。辛亥，進方物。遼主命北院樞密副使蕭革、牙之壬子遼軍於河曲。革言：「元昊親率黨項三部來遼，主命革詰其納叛背盟。」元昊伏罪，賜酒許以自新。遣之遼，主欲還蕭惠曰：「元昊忘奕世恩，萌姦計，車駕親臨，不盡歸所掠，天誘其衷，使彼來迎，天與不圖，後悔何及。」遼主從之。督數路兵掩襲夏人，已有備。詰曰：「夏人列拒馬於河西蔽盾。」



以立惠擊敗之夏師退惠麾先鋒及右翼邀之夏師  
千餘人突出大風忽起飛沙眯目蕭孝友一軍先亂  
夏人乘之遼師大潰蹂踐而死者不可勝計駙馬蕭  
呼敦舊作胡  
觀今改爲所執遼主單騎突出幾不得脫元昊命  
勿追 桂陽蠻降授蠻酋三人奉職 直集賢院兼

國子監直講石介通判濮州富弼等出使讒謗益多  
人多指目介介不自安遂求出 元昊遣使如遼以  
先被執者來歸遼主命所留夏使亦歸其國 十一

月戊午朔司天言日當食不食 辛酉遼主第將校  
功罪欲誅蕭孝友以太后救免 壬戌以西界內附

香布爲團練使 甲子監進奏院劉巽集賢校理蘇

舜欽竝除名勒停直龍圖閣兼天章閣侍講史館檢

討王洙落侍講檢討知濠州集賢校理刁約通判海